



Inatsisartunut ilaasortaq Mimi Karlsen, Inuit Ataqatigiit  
Inatsisartut Allattoqarfiat  
-/maani

16-09-2019  
Suliap normua. 2019-19223  
All. nr.11528281

**Naalakkersuisuni tullersortasussaq pillugu § 37 naapertorlugu apequttip  
nr. 2019-299-ip akineqarnera**

Postboks 1015  
3900 Nuuk  
Oqarasuaat (+299) 34 50 00  
E-mail: govsec@nanoq.gl  
www.naalakkersuisut.gl

Asasara Mimi Karlsen,

Inatsisartut suleriaasianni § 37 naapertorlugu Naalakkersuisuni tullersortasussaq  
pillugu apequteqarsimavutit. Apequtigisatit uannit  
akisassanngortinneqarsimapput.

**Naalakkersuisunut apequtigisat:**

1. Naalakkersuisut siulittaasuat tullersorteqarpa  
Naalakkersuisut siulittaasuata tullianik?
2. Naalakkersuisut siulittaasuat tulleggannippat  
ajoquserlunuunniit napparsimaleriataarpat kia  
paarlakkallassavaa?

Siullertut Naalakkersuisunut siulittaasup tullersortaanik  
toqqaasoqarnikuunngimmat paasissutissiissutigissavara.

Naalakkersuisuniipput Naalakkersuisut siulittaasuat Naalakkersuisunilu ilaasortat  
arfineq-marluk. Naalakkersuisut tamarmiusut Inatsisartut Naalakkersuisullu  
pillugit Inatsisartut inatsisaanni § 22-mi aalajangersakkat malillugit  
toqqagaasarpud. Aalajangersakkani taakkunani ilaatigut aalajangersarneqarpoq  
Naalakkersuisut siulittaasuat immikkut Inatsisartunit aamma Inatsisartut  
ilaasortaannit toqqarneqassasoq kiisalu Naalakkersuisut sinneri Naalakkersuisut  
siulittaasuata inassuteqarneratigut assigiimmik toqqarneqassasut.

Naalakkersuisuni siulittaasup tullersortaanik toqqaanissaq pillugu inatsisini  
aalajangersagaqanngilaq. Paarlattuanik Naalakkersuisuni siulittaasup  
tullersortaanik toqqaasoqassappat tamanna Inatsisartut Naalakkersuisullu pillugit  
Inatsisartut inatsisaanni § 23, imm.1 malillugu oqartussaaffinnik agguataarinertut  
isigineqassaaq.

Tamatuma kingunerissavaa, apeqqutip aappaa takuuk, Naalakkersuisut siulittaasuat oqartussaaffinnik agguaanerup iluani Naalakkersuisuni ilaasortat arlallit akornanni ataatsimik arlallinnilluunniit toqqaasinnaassammat, assersuutigalugu napparsimasoqartillugu allatulluunniit sulinnigiffeqartoqartillugu. Naalakkersuisuni siulittaasup tullersortaanik toqqaasoqarnikuunngimmat tamanna tamatigut immikkut aalajangiinikkut pisussaavoq.

Paatsoortoqannginnissaa pillugu Naalakkersuisut siulittaasuat Naalakkersuisuni ilaasortanut pisussaaffinnik akisussaaffinnillu inatsisit naapertorlugit Naalakkersuisut siulittaasuanit isumagineqartussanik tunniussisinnaanngimmat erseqqissaatigissavara. Matumani assersuutigalugu taaneqarsinnaapput Naalakkersuisut oqartussaaffiik Naalakkersuisuni ilaasortat akornanni agguasinnaaneq, Naalakkersuisuni ilaasortat pisussaaffiik arsaarinnineq kiisalu qinersinissamik suaarutiginnineq.

Tamakkulu pissutigalugit pisussaaffiit Naalakkersuisuni ilaasortanut tunniunneqartut saniatigut pisussaaffinnik Naalakkersuisut siulittaasuata tullersortaanut imaluunniit Naalakkersuisunut siulittaasuugallartumut tunniussisoqarsinnaanngilaq.

Pisullu ilaanni Naalakkersuisut siulittaasuat immikkut pisussaaffimminik immikkullu akisussaaffimminik inatsisini Naalakkersuisup siulittaasuatut isumagineqartussanik piffissami aalajangersimasumi isumaginnissinnaajunnaassappat taamatut pisoqassappat Inatsisartut Suleriaasianni § 57 malillugu Inatsisartut Siulittaasoqarfianni oqaluuserineqarumaartoq, matumani inatsisini tunngavigineqartut iluanni aaqqiissutissamik tulluurtumik nassaarnissaq siunertaralugu. Taamatulli massakkut pisoqanngilaq.

Apeqqutigineqartumut allanik ilanngussassaqaanngilanga.

Inussiarnersumik inuulluaqusillunga



Kim Kielsen